



## Samþykkt fyrir ungmennaráð Akureyrarbæjar

### Stofnun og tilgangur

Ungmennaráð Akureyrarbæjar var stofnað árið 2010 á grundvelli æskulýðslaga nr. 70/2007.

Í 11. gr. laganna segir: „Sveitarstjórnir hlutast til um að stofnuð séu ungmennaráð. Hlutverk ungmennaráða er m.a. að vera sveitarstjórnnum til ráðgjafar um málefni ungs fólks í viðkomandi sveitarfélagi“.

Tilgangur ungmennaráðs Akureyrarbæjar er annars vegar að veita ungmennum fræðslu og þjálfun í lýðræðislegum vinnubrögðum og hins vegar að skapa vettvang og leiðir til þess að gera ungmennum kleift að koma hugmyndum og skoðunum sínum á framfæri m.a. við kjörna fulltrúa sveitarfélagsins. Samfélagssvið og frístundaráð hafa fræðsluskyldu gagnvart fulltrúum í ungmennaráði og skipuleggur frístundaráð fræðsludag fyrir ungmennaráð að hausti.

### Hlutverk

Hlutverk ungmennaráðs er að vera vettvangur ungmenna til að hafa áhrif á næsta umhverfi sitt. Sem dæmi um starfsemi ungmennaráðs má nefna:

- Ungmennaráð skal eins og kostur er hafa frumkvæði að umfjöllun mála.
- Ungmennaráð getur komið með ábendingar um öll málefni sveitarfélagsins.
- Ungmennaráð beitir sér fyrir bættri þjónustu við börn og ungt fólk.

Nefndir og ráð bæjarins skulu senda ungmennaráði til umsagnar öll málefni sem snerta ungt fólk sérstaklega. Hafa skal í huga að í 12. gr. Barnasáttmála sameinuðu þjóðanna, sem jafnframt er ein af grundvallarreglum sáttmálans, stendur að börn eigi rétt á að láta í ljós skoðanir sínar í öllum málum er varða þau og að tekið sé réttmætt tillit til skoðana þeirra í samræmi við aldur þeirra og þroska. Barnasáttmálinn var lögfestur á Íslandi 20. febrúar 2013. Ungmennaráð gerir tillögur til frístundaráðs um hvert það mál sem ráðið telur tengjast hagsmunum og aðstæðum ungs fólks. Ráðið fylgist með því, eins og við á, að stofnanir og þjónusta sveitarfélagsins vinni með hagsmuni ungs fólks að leiðarljósi.

### Tilnefning og skipan í ungmennaráð

Fulltrúar í ungmennaráði geta orðið þeir einstaklingar sem eiga lögheimili í sveitarfélaginu og eru á aldrinum 12 (7. bekkur) - 17 ára á árinu sem skipað er í ráðið hverju sinni. Í ungmennaráði skulu sitja 11 nefndarmenn. Að minnsta kosti fjórir kjörnir nefndarmenn af grunnskólastigi og fjórir af framhaldsskólastigi. Þrjú sæti geta raðast óháð skólastigi en haft er til hliðsjónar mikilvægi þess að í ungmennaráði séu fulltrúar þess ólíka samfélags sem Akureyri er. Gæta skal þess að hlutfall drengja og

stúlkna sé sem jafnast að teknu tilliti til kynræns sjálfraðis. Ungmennaráð mun fara inn í alla skóla á Akureyri með stutta kynningu og að því loknu mun öllum skólastjórnendum berast póstur sem skal berast til nemenda á aldrinum 12 (7. bekkur) - 17 ára þar sem útskýrt verður hvernig hægt er að sækja um í ungmennaráði Akureyrarbæjar. Að auki verður sendur póstur á Ungmennahúsið, velferðarsvið og önnur svið sem þjónusta ungt fólk til að reyna að ná til hópa þeirra ungmenna sem hugsanlega sækja ekki skóla en eru á aldrinum 12 (7. bekkur) - 17 ára með það að markmiði að fá sem mesta samfélagslega breidd í ungmennaráð. Nefndarmenn sitja í ungmennaráði tvö ár í senn og er þá aftur efnt til kosninga en sitjandi nefndarmönnum gefst kostur á að bjóða sig fram aftur. Stefnt skal að viðburði ár hvert í tengslum við kosningar í nýtt ráð, þar fái frambjóðendur tækifæri á að kynna sig og í kjölfarið fari fram rafrænar kosningar þar sem öll ungmenni með lögheimili í sveitarfélaginu á aldrinum 12-17 ára hafi rétt til að kjósa. Ungmenni eru hvött til að huga að fjölbreytni í ráðinu þegar þau ganga til kosninga.

Fulltrúa í ungmennaráð skal skipa fyrir 1. nóvember ár hvert.

## **Fundir**

Ungmennaráð fundar að öllu jöfnu einu sinni í mánuði yfir vetrartímann allt að átta sinnum alls. Í mars ár hvert skal haldinn sérstakur bæjarstjórnarfundur unga fólksins og 2x á ári skulu haldnir sameiginlegir fundir frístundaráðs og ungmennaráðs, einn að vori og annar að hausti. Haustfundurinn skal vera sérstaklega fræðslumiðaður og skal tryggt að nýkjörnir ungmennaráðsfulltrúar hafi forsendur til að vinna með stjórnkerfi bæjarins og hafi fengið fræðslu um hvernig koma eigi málefnum á framfæri og geti sjálfst óskað eftir fræðslu.

Ungmennaráð fundar því samtals allt að 12 sinnum á ári. Um fundarsköp á fundum ungmennaráðs gilda ákvæði sveitarstjórnarlaga og reglur um almenn fundarsköp með þeirri undantekningu að ekki er skipað í embætti og bera allir nefndarmenn jafnmikla ábyrgð og skipta þeir fundarstjórn á milli sín. Starfsmaður í samráði við ungmennaráð boðar til fundar með dagskrá. Í dagskrá skal vísað til gagna um þau fundarefni sem til umfjöllunar eru eftir því sem kostur er. Dagskrá skal send til aðalmanna í síðasta lagi tveimur sólarhringum fyrir fund. Hægt er að boða til fundar með styttri fyrirvara eða samþykki allra nefndarmanna og skal það bókað í upphafi fundar. Heimilt er að taka mál til meðferðar í ungmennaráði þótt ekki sé það tilgreint í dagskrá. Þó er skylt að fresta afgreiðslu slíks máls ef einhver nefndarmaður óskar þess. Mál skulu tekin til umræðu og afgreidd í þeirri röð sem þau eru á dagskrá nema ungmennaráð ákveði annað. Afl atkvæða ræður úrslitum mála. Starfsmaður sér um að fundargerðir séu skipulega færðar í gerðabók og í tölvu og að allar samþykktir séu bókaðar nákvæmlega.

## **Þjónusta Akureyrarbæjar við ungmennaráð**

Ungmennaráð fær greitt fyrir fundarsetu í samræmi við Reglur um launakjör og starfsaðstöðu bæjarfulltrúa og nefndarmanna hjá Akureyrarbæ. Að hámarki er greitt fyrir 12 fundi á hverju ári. Að auki beinir Akureyrarbær þeim tilmælum til stofnana bæjarins að þær veiti ungmennaráði aðstöðu til fundahalds án endurgjalds. Frístundaráð úthlutar fjárhagsramma til ungmennaráðs í samræmi við samþykktan fjárhagsramma bæjarstjórnar fyrir hvert starfsár. Ráðið gerir starfsáætlun í samræmi við úthlutaðan fjárhagsramma fyrir næsta starfsár vegna verkefna ungmennaráðs.

Ungmennaráð getur og er hvatt til að sækja styrki til frístundaráðs fyrir sérstökum tilfallandi verkefnum hvort sem um er að ræða verkefni heima eða erlendis.

Verkefnastjóri Barnvæns sveitarfélags er umsjónarmaður ungmennaráðs. Umsjónarmaður ber ábyrgð á rekstri og stjórnslu ráðsins, þ.m.t. fjármálum og framkvæmd ákvarðana þess. Umsjónarmaður hefur málfrelsi og tillögurétt á fundum ungmennaráðs. Umsjónarmaður ungmennaráðs aðstoðar við upplýsingaöflun úr bæjarkerfinu ásamt því að birta fundargerðir ráðsins á vefnum. Fundargerðir ungmennaráðs eru birtar á vef Akureyrarbæjar. Fundargerðirnar eru teknar til kynningar á fundum frístundaráðs.

### **Samskipti**

Verkefnastjóri Barnvæns sveitarfélags er tengiliður ungmennaráðs við bæjarkerfið. Ungmennaráð á áheyrnarfulltrúa í frístundaráði og fræðsluráði.

Ungmennaráð kemur erindum sínum á framfæri við bæjarstjórn eða stjórnslu bæjarins með formlegum hætti, þ.e. með bréfi eða tölvupósti. Akureyrarbæ ber að svara erindum með bréfi eða tölvupósti.

Samþykkt í frístundaráði 6. apríl 2017

Samþykkt í bæjarráði 22. febrúar 2018

Samþykkt í bæjarstjórn 6. mars 2018

Breytingar samþykktar í bæjarstjórn 3. desember 2019

Breytingar samþykktar í bæjarstjórn 19. janúar 2021